

**Bokslepp 24.5.2018 kl 19.00: Ein våg me veit um. Arbeidsliv ved Mjøsvågen.**

Osterøy sogelag i samarbeid med Vener av Mjøsvågen skipar til bokslepp for boka «Ein våg me veit um. Arbeidsliv ved Mjøsvågen» **torsdag den 24. mai kl 19.00 i tidlegare Nicolai Mjøs (Askild Mjøs) metallvarefabrikk ved Mjøsvågen i Hosanger.** Boka er på 204 sider og er rikt illustrert med om lag 200 bilete.

Metallvarefabrikken ligg på sørsida av Lusavågen. Og Lusavågen ligg rett sør for parkeringsplassen ved Hosanger kyrkje. Bruk gjerne denne parkeringsplassen.



Mjøsvågen er dei seinare åra vorte ein attraktiv møteplass med søndagssommarkafe, galleri, kulturopplevingar og smakebitar frå eit aktivt handverk og småindustrimiljø. Og sommaren 2018 vil tilbodet bli utvida.

No kan du også få oppleve arbeidslivet ved Mjøsvågen heime i godstolen i ei bok med gode historier og mange flotte bilete. Både kjent og gløymt soge er

omtalt. Av det gløymte er m.a. garveriet som gjekk opp i flamar og påfølgjande 23 vitneavhøyr.

Under boksleppet orienterer

Geir Kleiveland, forfattar og leiar i Osterøy sogelag, om boka og fortel litt og syner bilete frå boka.

Lars Mjøs i Vener av Mjøsvågen fortel om prosessen og om samarbeidet med sogelaget og forfattaren.

Osterøy museum ved Anne-Mari Hannisdal og Nikolai Tallaksen fortel om rolla som småindustrimuseum og verdien av dokumentasjonen frå arbeidslivet ved Mjøsvågen.

Åse Nilssen orienterer om komande aktivitetar ved Mjøsvågen i 2018.

Det vert omvising i støyperibygget. Øystein Øvsthus orienterer og fortel om planane om landhandel i bygget.

Ordføraren i Osterøy, Jarle Skeidsvoll, vil stå for sjølve boksleppet. Men først trekk han opp perspektivet for Mjøsvågen i regional og nasjonal samanheng.

Det vert enkel servering og høve til å kjøpe boka til ein redusert pris.

Boka tek føre seg dei ulike næringsaktivitetane folket ved Mjøsvågen har drive fram gjennom tida. Gardsbruka var småe, og det var nødvendig med ulike attåttnæringar.

Frå gammalt var det mange som var på bygningsarbeid. Seinare kom andre yrke til. Her var garvarar, fargarar, skreddarar, skomakarar, landhandlarar, tekstilprodusentar. Men kanskje meir spesielt var det at det utvikla seg næringsklyngjer i fleire næringar, det som i dag er så mykje omtykt. Ein føregangsmann startar og oppnår suksess. Det får andre til å hengja seg på. Ved Mjøsvågen skjedde det med kistemakarane, der den fyrste i løpet av eit par tiår fekk fylgje av sju-åtte som også laga kister og skrin og koffertar. I tiåra før og etter 1900 var det å laga kister ei viktig næring ved Mjøsvågen. Noko av det same skjedde i metallfaget. Også her fekk føregangsmannen fylgje av fleire som starta eigne verkstader, og i lang tid var metallverkstadene viktigaste arbeidsplassane i bygda. I dag har ein av desse verkstadene, Mjøs Metall, vorte ei av dei største bedriftene i Osterøy kommune.

Det er historia om dei mange næringsgreinene denne boka handlar om.

Bokprosjektet er støtta av Hordaland fylkeskommune og av Høgskolen på Vestlandet. Osterøy museum får overta mykje av dokumentasjonen som har vore nytta og vil få alle foto, både nye og gamle frå arbeidet med boka. Som tilleggsmateriell til boka vert over tusen foto lagt ut fritt tilgjengeleg på Osterøy sogelag si heimeside der albumet får inndeling som innhaldet i boka.

Fylkesdirektør for kultur og idrett i Hordaland fylkeskommune, Per Morten Ekerhovd, har då han var fylkeskonservator, hevda at «Havrå er blant dei viktigaste kulturminna i Noreg. Eg trur Mjøsvågen med tida vil bli vurdert på same måte, og at ein i framtida vil bli veldig glade dersom vi tek vare på det no.» (Bygdanytt 11. februar 2011).